



才士與名山每有神契或相望而不能遊或遊而無名
篇以發之猶之乎不遊丁丑秋顧子俠君有金焦之遊
扁舟泛大江窮探巖壑吟嘯之聲與山籟江濤相應荅
歸而視余以遊草清幽蒼莽兼宋元諸家之長想見俠
君褰衣天畔命酒高歌其風流在靈運太白間也蓋人
與山兩不負矣憶己酉春余與家荔裳同遊金山得句
云楚天雙過鳥吳苑一秋毫又遊焦山有驚濤天外轉
殘月夜深來之句頗爲荔裳阮亭所賞荏苒三十年矣
此後屢過之而題咏寥寥手俠君此編不禁神往滄浪
寓公宋犖題



金焦集

丁丑之秋余有廣陵之行二客從游自惠山至京
口渡江每遇古人遺蹟輒捫蘿陟巘摩挲斷碑嘯
咏竟日寓興教寺者半月復乘扁舟揚帆江心風
浪浮天水石相激砢砢然動蕩心魄余時縱酒狂
吟笑謂客曰自采石黃樓已後世無此興久矣因
檣舟登眺徧搜金焦兩峰之奇勝意有所會援筆
輒書命二客投置囊中歸艸堂後檢校新詩共得
四十首并附以他詩總名之曰金焦集云間丘顧

嗣立序

重九前一日舟行山塘望虎丘即事口占成四

絕句

亂葉橫枝隔水香
秋風七里接山塘
帽檐好向船頭側
只欠籬邊一朵黃

遠煙冪冪籠山色
衰草離離沒馬蹄
小扇輕衫行處好
遊人踏破白公隄

紅窗青篾浪相迎
小閣斜樓鏡裏行
秋蝶有情飛不遠
翻翻隨著賣花聲

短簿祠荒雲氣連
塔鈴遙語劔池邊
又將風雨淒涼意

別作音佐重陽一樣天

望亭書所見

撥刺魚上又咿啞
檣相語鷓鴣蹋水飛
欲來又忽去

九日登九龍峰

青山遠迎人
秋氣正蕭爽
黃花滿鬢香
到處游屐響
幽尋始惠山
同行客得兩
仰見光冥濛
相攜飛步上
蜿蜿如藏龍
雲霄挂千丈
峭壁驚嶙峋
滑石怪剗礮
倦脚藉草坐
縣郭平如掌
嵐光映溪色
景物自駘蕩
令節恣嬉游
銜尾集画榜
絕勝治平寺
吳儂鬪錢鏹
天風忽飄蕭
木葉振林莽
白雁一行來
悲鳴意惘惘
同儕勸言歸
興盡不須強
回船把茱萸
擘泥送雙槳
茲游類半酣
此中尚怏怏
何當立山顛
吸盡湖沆瀣

酌第二泉

火候頻將蟹眼探
香風入手半甌藍
弱籠攜得茶千片

細嚼清泉一勺甘

遊秦園用少陵陪鄭廣文遊何將軍山林韻十首

秋日園林好微波浸石橋泉聲分遠澗嵐氣映曾霄竹
裏花相映雲邊鶴未招入門幽興愜于此暫逍遙
風緊天容變雲陰滿太清山高難見日樹容易聞鶯荷
葉堪盛酒蓴絲好作羹眼前多野趣還道是山行
蒼松與怪石兩不辨千支澎濤濤翻屋峻增影落池水
清魚自樂花老蝶先知可奈巖邊草萋萋自倒披
莫問人間世相看鏡裏花夢迷蕉下鹿病悟酒中蛇山
色排牆入月光待夜賒清暉映几席誰似謝公家

攜手平臺望難禁笑口開玄談愛支許新句出歐梅白
酒催愁散黃花引興來漫天橫雁字好去宿萋萋

淺淺

音

乳竇響雪浪瀉流泉細點初霑袂涼颼已透緜

水風牽荇帶花石繡苔錢便欲安茶竈清甘飲玉川

冉冉蓮衣落無風韻自香槐陰鋪砌滿柳浪入池涼片
石亭孤立回廊屋半藏九龍何處是倒影見穹蒼

吟詩白傅宅載酒習家池覓句乘輕屐穿花倒接羅粉
腰迴鳳子黃鶯啞鵝兒魚鳥如相識濠梁步步隨

跼踏樊籠內高飛敢望雲空懷買山志未辦送窮文佳
興逢今日秋光惜半分野鷄催客散隔葉亂紛紛

好景真難別歸來意若何郭含斜日遠舟載晚風多隔

岸沈山影前溪送櫂歌勝遊餘興在宵夢約重過是夜泊舟惠山

下至夜半始行

次日舟抵常州入城訪方大共樞徐四學人相敘竟日各贈以詩

方大共樞

去年塵土賦京華巷北街南映晚霞大定菴中人載酒
三忠祠裏客停車丙子歲余與共樞同客京師共樞寓大定菴余寓三忠祠行蹤怕看霜前葉
愁緒真同雨後花黃菊紫螯今日共方干新句與誰誇

徐四學人

偉長鄴下筆鋒鈿詞賦翩翩羨爾兼野水柴門停画舸
秋風書屋亂芸籤新篇尚為梅花欠今春有撥梅之約未果舊恨時

因柳葉添

去歲學人招集大定菴共賦秋柳四絕

鴈字參差霜正落連宵夢遶

白雲尖

學人所居名白雲尖

遊鶴林寺

小橋流水漾江天古墓荒涼松樹邊

寺對黃鶴山山下有米南宮墓

剔蘚重

尋米老字

寺壁石刻率多剝落唯南宮書城市山林四字尚存

擔瓶仍試寄奴泉

寺中井名秋風

竹院人聲細

鶴林一名竹院唐人詩所謂因過竹院逢僧話又得浮生半日閒也

燈火禪房僧影懸

方丈懸馬祖遺像

夜半潮聲驚鶴夢月中仿佛下芝田

遊竹林寺

遙指深林日半曛滿身山影似流雲入門陡覺寒生袂
取徑爭疑綠上裙鍾起樹梢香細細鳥飛巖際籜紛紛
林公泉畔馮高處四面相看是此君山半有林公泉為林泉禪師所鑿

京口觀打圍歌贈宋守備

柳營風嘶白鼻駒銀鞍錦障堆雲霞老兵健兒齊結束
韝鷹揜犬聲喧譁將軍短衣上玉鐙腰下寶劍涵霜華
弓刀切切陌上響攢蹏百馬紛如麻艸枯葉墮山磔卓
荆榛蒙密當途遮麇麇懾竄兔撲朔雄雉鷩鷩翅觶沙
側身脫轡飛白羽號風泣雨爭投置岡頭飛礮巨石裂
青天誰掣黃金蛇收禽會衆藉艸坐燭毛魚肉騰酒車
將軍仰笑士卒舞嘈嘈醉耳彈琵琶自笑儒生弄柔翰
堆書僵卧同鼯鼯相如上林徒自侈子雲羽獵何太誇
豈若戈鋌耀山谷親覩雨血紅翎斜陡覺風生鼻出火
興豪媿乏漁陽搗酒酣上馬蹋歸路金焦江面攢雙丫

十四日抵莫步至避風禪院坐釣魚臺望江復
沿江岸取徑經昭關踏月歸寓

江風吹日落餘光在山上水面結陰霞沈沈夜氣王入
寺俯峭壁縱目盡軋塊金焦兩冥濛歸鳥影相向潮聲
落空巖勢若翻甕盎此身渺一粟臨風恐飄颺釣魚者
誰子欣然忘得喪紆餘取歸路孤光滋瀆瀆長嘯出昭
關天風助悲壯江心起鞞紋金波涌壘嶂蠟屐破松杉
舉頭月正望

十五日寓揚州興教寺看月

木魚響歇晚鐘鳴碧瓦金波浸滿城光射牀頭孤客語
影移牆角老僧行詞人夢斷青樓歇帝子魂消古墓平

試向玉鉤斜畔望今宵端正幾分明

十九日鹽城宋射陵興化李若金諸公有平山堂展重陽登高之舉雨阻未果集寓齋分韻得元字

回想登高處分明隔歲論雲烘黃葉寺煙溼菊花邨壁挂新題句筵開舊泛尊天公真解意風雨補前番

甚晴

今歲九日天氣

次殷彥來卜居邗上韻二首

倦遊司馬幾年餘江北移家結草廬背郭堂因杜老築臨江宅趁子山居門前遙認新栽樹架上初齊舊著書二十四橋無限好來春油壁放輕車

江左風流迴異常魏舒領袖更堂堂歌場舞榭繇華地海物江肴煙水鄉幾處錦帆橫北郭誰家水調隔西廂屋邊莫用多移竹好放隋隄秋月光

題竹林小照二絕

葉翦藍羅響萬竿滿身凝綠夢初殘怪他撐撥詩情發雪案風櫺閣筆難

霜毫落處冷颼颼仿佛東林月上時只想春深雷雨過玉盤捧出錦綉兒

海寧沈岱瞻以所著孤子吟索題漫賦一律

腸斷趨庭一見難只馮夢裏話團圓三年物變容顏瘦千首詩成涕淚乾述德謝家新句好補亡東氏舊編刊

蓼莪三復添悲愴手展長吟不忍看

高郵李百藥過訪寓齋出所作詩賦見示賦此贈之

我來寓維揚稅駕方五日晨起客打門披衣延入室狀
貌覺崎嶇進退還秩秩自言家秦郵僻壤尚樸質讀書
陋章句風騷采華實蚩蚩小時輩見面不記一得君秀
楚詩愛翫愈吾疾一見道余意宿願良已畢出其囊中
作清越更超軼覽社光蒼茫秋聲語蕭瑟古賦麗以則
新詩穩格律一章數遍讀才思逾橫溢余生多坎壈身
世屢遭紕笑傲倚東軒孤吟伴蟋蟀感君癖嗜痴傾蓋
如膠漆薄俗類虬蟬小儒同蟣蝨光燄杜與韓餘子何

足述君才既倍人好古定誰匹片言欲披聾不待枚生

七

百藥方有耳疾

吳山路縣亘淮水波蕩涵相逢兩浮革重會未
可必酒狂君繼白書淫我效謚扁舟約論文歸去好種

秫

栖靈寺

即大明寺也在蜀岡

杖策披尋第五泉大明寺外蜀岡邊鬪雞戲馬迷榛莽
玉樹璠花斷管絃黃葉辭枝黏柏翠晚鐘出寺入炊煙
他年幸遇風流守留得平山此地傳

平山堂懷古

歐陽公手題扁額三字尚存

霜銷雲氣收日脚正亭午江光連碧瓦隔岸青可數吳
山隱密林淮岫矗極浦積陰挾寒濤勢欲到堂廡緬懷

六一翁流風邁千古倚厓置棟梁于焉運斤斧堂成集
羣僚清詩日吟苦渡水采芙蓉皓腕牽纖縷翠蛾趁月
歌紅裙蹋筵舞遂使狐兔場翻作圖書府茫茫五百年
勝事今誰覩空餘三字顏斗大映屋宇想當下筆時肘
腋勞撐拄著紙墨淋漓力挽千鈞弩形如鸞鳳翔結構
各綴補歲久墨花妍疎宕更媚嫵摩挲不忍去但以指
畫肚夕陽亂平蕪黃葉響山隴蜀岡鳥上下迷樓送鐘
鼓何當春明來松翠潤細雨屐齒印庭綠挑泉嚙石乳
醉翁許爲徒千載作賓主

紅橋泛舟看紅葉限霜字

小艇出城去寒林見早霜半篙橫野水一樹舞回塘白

髮偏多興

謂興化李艾山
鹽城宋射陵也

黃花猶賸香紅橋相映掩餘綺挂

斜陽

登金山

銅鉦挂樹方臃腫粼粼江面朝霞烘樓臺絢爛耀金碧
蒸嵐瀕洞拖長空扁舟一葉逆流上打頭風急波翻蓬
櫓聲鷗軋羣鷗發石闌笑指委蛇通雕梁繡戶發光彩
十年不到心忡忡龍井亭邊汲江水裴公洞裏尋僧鐘
振衣飛步凌絕頂吳楚八九吞胸中拂袖癡雲穿塔行
排檣巨浪乘風攻潛蛟黑霧騰郭墓江豚腥氣噴朱宮
黃葉如雨落山脚白鳥散雪隨回風江天漠漠凝空碧
雜花縹緲迷雙瞳玉帶橋邊步宛轉風流軼事難重逢

朝陽洞冷山骨露草木堅瘦光玲瓏往從焦山過其下
長歌激越嘲神工去歲游焦山詩頗有唐突金山之語今來此山頓自失狂言
唐突真兒童蕭疎濃豔各有態山林廊廟那須同此番
游興頗恣橫得隴望蜀情何窮開帆重抵焦公洞兩峰
辨出誰雌雄

自金山放船至焦山用東坡韻

江流激激山耿耿秋深早寒生江南挂帆側柁入碧水
紅日上竿纜過三船頭浪急風漸王頰舷不動同眠蠶
篙師歌笑若平地儒生瑟縮吾甚慙回視浮玉隔船尾
一堆白雪噴深潭天公定解好奇癖幻出詭異令沈酣
樓臺天視橫北固恨不飛步開雄譚深谷悲風振魚舍

朱宮亂沫驚僧龕須臾已抵象山脚瀧瀧石罅何清甘
樹色隔江引游興翦波一棹寧嫌貪自茲脫險入佳境
顛沈頃刻真難堪攜魚挈榼上絕壁好辨軟脚山頭蒼

重遊焦山

長風落木聲刁刁山根夏擊聞鈞韶扁舟劈箭破雪浪
石齒纍纍剛停橈去年春明泊山下沿江綠艸斜褰腰
披尋舊路蹋黃葉樹梢颿影移青霄遙岑歷歷翠欲滴
濃澹時見橫雲飄噉蔗自尾幽興熟三詔洞口聊逍遙
取徑禪房行犖确驚波合沓飛山椒寒煙著樹忽吹散
幽禽怪鳥音相招荒荒絕頂四面白海門浴日紅光搖
玲瓏象山儼屏障隔波兩兩爭茗蕘清秋山骨更磔卓

疎花野草眠漁樵翻怪春來桃李俗西子何用燕支描
此遊殊覺興不淺長歌下嶺衣飄飄瘞鶴殘碑問何許
雷轟石上初生潮惡風白浪苦相激江聲疑挾龜鼉驕
笑呼舟子亟解纜中流一瀉真陶陶

登北固山

城尖徑仄天地秋長空一覽江山浮風煙黯慘無定態
茫茫堆積萬古愁甘露寺邊初下馬多景樓上重探幽
白蘋紅蓼鋪鏡面鷺鷥飛起蘆花洲亂山朶朶列檻外
長江匹練遙相兜金焦矗起如怒浪青蓮對擁不冝收
當年戰鼓遏江水左蠻右觸嘲孫劉戟枝翻倒冰夸窟
刀頭熱血噴黃流地坼天荒變俄頃殘陽明滅波中漚

紫髯桑蓋竟何在但見很石眠荒丘愁來棄去不復顧
隔林纖月垂玉鉤栖鶻磔磔起山谷松杉人立森戈矛
疇童好辦京口酒一澆魄礪千鍾休

十月五日歸艸堂漫題一絕

輕舟一葉趁秋潮贏得新詩興未消若把江山誇勝景
就中奇絕是金焦

張漢瞻過訪艸堂爲其母李太君七十索詩兼
話都門舊事賦此贈之

前年客京華友朋時結隊丁香盛妙光芍藥豐臺最查
錢聯轡行德尹亮功二劉日相對大山北固座上推齒尊無如吾子倍
老成擅文章開譚豁蒙翳親老復家貧牢騷滿聲歎瘦

馬蹋槐花形容失故態斜街時過從莫問明與晦雪酒
擘紅泥黃牙嚼春菜耳熱潤枯腸傾倒出肝肺雄心各
自負青紫等拾芥首偕老秋風霜蹠屢顛蹶搏扶息北
溟蜩鳩笑鵬背幾穿百步楊誰折一枝桂分手彰義門
匹馬蘆溝界南北杳茫茫關河自迢遞今夕復何夕對
影檐花細囊攜壽母詩浩汗富清製流俗列華筵庭階
堆玉幣冠蓋雜還來鄉閭羨高會豈若數篇詩鏗鏘鬪
妍麗用以進一觴千古寔佳話况子負重名青萍方砥
礪轉盼洛陽春陌塵紅滿埭看花過上林相期並征袂
顯揚固有時幸勿傷老大送喜扶潘輿杜老詩可繼

新安朱翠庭索題菊花四絕

買菊

買得寒葩數本黃蕭疎枝葉帶微霜夜深更起移燈看
花影紛紛上粉牆
紅蕩紫綻列成行堪傲盧家庭畔香好約無腸公子到
與君痛飲百千觴

載菊

柔櫓咿啞香氣催波光花影兩相猜不從彭澤籬邊覓
却向天隨宅上來
船頭佳色映斜暉采采黃金欲上衣白露滿團盪槳去
好教相伴月明歸

題狄庶常立人悼亡詩後

才女憐風貌詞官矜少年竟隨花早落不與月重圓鳳
泣離弦絕鸞悲清鏡懸惟餘綠窗句風亂海棠前

元傳與礪故妻

孫氏綠窗遺橐有詩云獨坐小窗無氣力隔簾風亂海棠絲立人有海棠船故引及之

甲園十二景

溧陽狄庶常立人尊人拂衣種藥之所以其始于甲寅成于甲子故名其地為南宋趙忠愍公淮故居即

今里中所傳北府是也

息關

水竹林泉北府空幾番却埽徑委蛇天池未許搏風到
門設常關六月時

秋影草堂

銀河清淺閣檐頭籬落香濃絡緯愁月在柳梢花在地
却從何處去尋秋

逸舫

紅窗眼小綠波清只欠青翰擁鄂君四海五湖風浪滿
孤舟羨爾草堂橫

披霞幄

九枝燈影映重霄深淺高低寶帳飄紅片紫芒搖颺處
遶牆急種碧芭蕉

韓偓詩紅菖薇映碧芭蕉

且軒

長日好邀劉昶飲良宵還與謫仙論五車縹帙千鍾酒
落落乾坤一旦軒

清陰館

百尺梧桐綠正全疎簾清簟午窗前涼颺引入蘧蘧夢

忘却門前赤日天

溶溪

游魚趁影啜花香行藕芙蓉葉送涼
菱刺菱尖橫水面
蓮房斜日睡鴛鴦

高靜閣

按邑志忠愍公駐節溧陽高宗賜以三石皆鐫泐御書曰蒼雲高靜忠義今蒼雲忠義兩石猶存獨高靜石為有力者攬去立人別構奇石補之因以名其閣

山骨稜稜乾蘚剜鬼神呵護聳奇觀
米顛好事呼為友
閣下應添拜石壇

嘯亭

林葉紛紛卷半空劃然響作吸天風
蘇門不隔人間世
却笑紅塵無臥龍

檀欒室

萬竿眼底都成趣千畝胸中漫自賢
最愛滿身依綠影
香風細細月娟娟

適適龕

軟飽三杯到黑甜渾如老衲倚蒼顛
人生到處堪行樂
山月江風索價廉

山雪

縞素漫漫滿目斑峰巒濃淡有無間
凍雲氣擁千溪樹
殘日光銜半尺山

輓潘雙南

城滿芙蓉花晝冥殘編惟賸讀書螢
驚人奇句推詩伯

罵座狂言號酒星組帳乍疑魂蕩漾靈牀怯見瘦伶俜
遺言葬我陶家側只當潘郎醉未醒

金焦集終

宇內之名山五千三百七十道書所紀洞天福地陽明
特其一焉世之游者每以五岳為期然嵩恒泰華無津
可逮吳越之山復輿篋舫輒臻其麓無攀躡之勞而有
壺觴朋友之樂此昔之人所以賦近游也中吳顧俠君
年來風雅之領袖嘗輯元人詩百家刊行之又注昌黎
韓子詩開其窾奧詩家奉為圭臬焉暇游鄧尉遂訪余
長水渡錢唐覽會稽之勝歸而成詩一卷卷中不盡山
陰之作而以山陰名集者念其先人考功君舊出宰之
地也余曩者七至山陰至必流連累月壺觴朋友晨夕
靡間歲在辛丑偕南昌王猷定于一番禺屈大均翁山
為後蘭亭會邦人與者一十九人其後死生契闊出於

意表求賦詩飲酒之陳迹邈不可得而考功君去此地
且五十年縣之父老猶能話峽山舊事指點在自然後
知善政之及人者深俠君之詩傳考功君之治績蓋百
世而不湮者已康熙三十八年小長蘆朱彝尊序時年
七十有一

山陰集

長洲 顧 嗣立 俠君

戊寅人日夜夢遊山陰道上得句云山山山半
映紅霞覺而足成之

鑑湖夾岸是桃花一曲清波引若邪襯出越中山色好
山山山半映紅霞

上元後四日入山探梅夜抵木瀆次早過靈巖
山下舟中偶題二絕

冷煙濕雪作年華釀得春山白半遮趁月好攜雙槳去
虎山橋下問梅花
提壺挈榼遠相招淺水撐篙覺路遙半嶺鐘聲一村樹

慢過九里十三橋

菖蒲潭香巴菴訪艸山上人

雀啁低枝戶半開漫天雪色傍檐堆常因好句思君久
却為梅花引我來半朵冷雲瘦景合數聲清磬暗香催
何因作个羅浮夢月落參橫臥綠苔

晚過石樓留宿漫題二絕

花邊四望笑喧豨濼濼湖光入酒杯最是吾曹慷慨處
孤雲落日萬峰臺

修篁高映白糝糊攀石捫蘿似畫圖客散悠然禪榻臥
好尋春夢寄須臾

肩輿行彈山下看花至石壁用東坡次李公擇

梅花韻

山頭嵐氣開露泫花光動薄雨間尖風天公任簸弄寒
香撲人面籃輿早蹋凍穿山如飛猱歌笑漫喧闐七十
二峰間數年未過從健鶻摩蒼穹驚兔逝少縱石馬寒
無聲蔓草臥翁仲東西一片白果園堪錫貢乍疑林雪
深却怪溪雲重枝上語關關時送小鳥哢石壁轟湖濱
孤光助唵諷忽逢相識人闌入拚飲痛遙岑分外青不
翅秦據雍板條鶯花須醉倒甘同夢何當移萬株蟠螭
徧栽種港水通画船石罅舞紫韉僧寮到處尋千山遊
脚共長嘯送飛鴻瑶琴歌雙鳳留連約桃花暫憩秦人
洞

蟠螭山向傳
桃花最盛

呼童荷鍤隨日抱酒一甕

自石壁至鄧尉山再用前韻

香風吹酒醒春意躍欲動林際笛聲來小樓正三弄青
青草牙出樹色初破凍衆山圍人聲恍如鄒魯鬪長旂
峻而險木杪顧僕從紛紛魚貫上何處容操縱穹窿高
插天勢亦相伯仲湖流更崩奔震澤傳禹貢笑指錢家
坎一帶白雲重看花豈獨人禽鳥亦奏哢竹外低數枝
瘦影堪嘲諷殘雪點枯藤冷香著指痛樓臺高上陳嶠
崒訝梁雍晚鐘出樹梢驚起羅浮夢佛像金銀開科枝
繞闌種松下駐輕車石橋躡飛鞚笙歌間梵聲雜沓笑
語共披尋惜忽忽到門只題鳳孤墳暮煙生未訪幽人
洞明日儻重來登山潑春甕

登吾家山用東坡松風亭韻

千枝萬枝迷山村十里五里團香魂尖風吹冷落樹杪
花光不夜先黃昏荒山片石平若掌指顧簇簇皆芳園
疎林放青酒旗動白酒好買朱顏溫四山凍雲影狼籍
明朝喜看推朝暎鄉市人稀鳥雙去落花滿地常關門
繞枝百巾自歎息寒霜寂寂渾無言悄然下塢覓花去
開船西崦陳金尊

附和詩

劉石齡介于

六年不踏湖邊村梅花萬樹縈夢魂明妝隔水似相
笑野橋殘雪春煙昏吾家山頭洵花海素波白浪堆
華園蚪柯雨蝕翠苔潤酥蕊風拆香燼溫繡花燭天

夜催曙銀湖金柱搖朱暎勝遊俯仰吒陳迹新語排
界崢詞門松風子已逼坡老縱有妙境難為言小亭
疎花未飄蕩且與爛醉雲階尊

坐法螺菴古梅下用前韻

尋花脚踏去歲村寒山一帶真斷魂長松夾路徑犖确
到菴香繞龕燈昏梨雲落莫喚不起啾嘈翠羽誰家園
霜根連蜷發嫩幹蓓蕾萬點春風温法螺梅花較
鄧尉稍遲鐘聲報晴
分外響花影倒映山頭暎茶瓜清話坐半日遊人繹絡
推蓬門彌山桃李漸放萼花匠點綴曾無言準擬重上
旋螺頂却話今日銷殘尊

附和詩

劉石齡

碧螺旋旋何處村石苔小徑尋芳魂微颺兼引佛香
細暝色欲上梨雲昏蜂喧鳥咽靜不到竟夕喜得依
幽園青萍流暉月蕩漾素霓飲澗泉清温橫斜收影
老蟾墮澹墨更寫朝林暎彈山菖蒲古潭上梅花密
處低蓬門吾於兩地敢軒輕春松秋菊先吾言來年
青鞵儻可辨相過次第傾山尊

和劉二介于妙巖亭看梅花再用前韻

我如凍蝶飄山村栩栩夢逐梅花魂菖蒲法螺行處住
枯腸不飲常昏昏誰念小庭數十樹驚枝啅雀唬空園
劉叉獨立強索笑苦吟月下香微温夜深靜卧寒入枕
詩成早擁東方暎山中入兮撲被歸清晨剥啄閭丘門

新詩研膠共屬和神來得句俱忘言昨夜樹梢月痕在
推窗欲飲花飛尊

附原詩

劉石齡

南枝移自山南村十樹百樹明月魂悄然片石坐花
下令我雙眼洗睡昏主人看花入山去惟有幽鳥嘯
林園啁枝見我故不避霏霏雪落寒香溫西林蒼蒼
尚斜照餘霞散綺疑晨暎沿流微吟寄孤賞板橋東
去月在門白雲漠漠到殘夢此時幽思誰能言主人
歸來豔桃李涓涓花露浮春尊

秀水訪朱竹垞先生賦此奉贈

風雅道日微俗儒見逾小百川誰障之秀水一詩老結

想廿年餘奉教苦不早昨挂吳江颿駕湖風嫋嫋入門
書堂清圖史左右遶脫略容疎狂言旨歎深宵武庫兵
縱橫戰舌漫自掉遺文隋劫灰有尤敢搜討先生顧之
笑局然欲絕倒出其家藏書龍宮炫海寶姓氏手編纂
斜行雜真草云此續百家一代事可了先生許以家藏
元人遺集借列小鳥
呀檐牙桃花映翠篠越甌泛犀液坐久日杲杲臨別意
殷勤真率豁懷抱後會約重三吳城花更好探奇辨金
石吟苦追郊島先生儻來過草堂話清醪

同楷亭上人訪盛宜山臥雨不值悵然有作

隨風步屨到郊園瘦竹天桃別一村野寺尋僧穿曲徑
踈籬聽犬認頽垣春濃未改詩中澹病小差停戶外喧

山陰集
聞道先生睡正穩紅霞蒸樹不開門

嘉善訪魏州來昆季不遇却寄此詩

風搖楊柳滿城春
穰穰河干訪隱淪
兩世論文猶孔李
一村同姓是朱陳
試飛燕子知留客
解語桃花漫笑人
罨畫園林景色好
道人何處岸綸巾

平湖道中二絕

桃花影接菜花畦
著麥苗風浪湧堤
半屋夕陽人跡少
綠楊絲裏鶉鴝啼
細草沿籬一道斜
橫拖略約是人家
粼粼錦浪三篙水
撐過溪邊無數花

舟泊桐鄉口占二絕

語兒溪畔草如茵
陌上熏風糝麩塵
急欲歸來問楊柳
不知綠到幾分春
游魚唼影躍清流
盡日殘紅打客舟
愛煞隔牆雙燕子
穿花落水伴人愁

雨中自湖上步至靈隱登韜光絕頂得三絕句

短衣拄杖當人扶
屐齒黏花印綠蕪
一幅米家山水畫
不將粉黛著西湖
飛來嵌竇野雲烘
細雨無聲綠樹中
唯有冷泉石上水
故噴亂沫響松風
金蓮池上弄潺湲
雨後江山指顧間
試看潮頭天半落
浪花低處盡青山

題錢唐吳寶岢擁書飲酒圖二絕

開局有得輒自喜一觴獨進復中之笑渠三萬六千日
半過狂吟痛飲時

擊節嗟哦舉白浮古今人物付糟丘十年重見圖中客
不道書淫贈醉侯

余與寶崖自湖
上別今十年矣

渡錢唐江

春江湧初日飛光如練白遙山作劍攢壁立青千尺張
帆滌中流幾葉風索索對岸喚西興音響一水隔回望
望江門城角聯山脊樹杪糝紅綠石根聚金碧沿江勝
果寺但見翠煙積潮頭如長蛇隱隱起窟宅惜無千鈞
弓誰向海門射須臾抵沙渾舟子笑啞啞犉牛如黃驢

蹋水聲拍拍登車載行李容膝苦跼踖沿江水淺沙灘上
悉以牛車渡人平地息危瀾天半橫奇石從此越中山拚破幾緲屐

過西興

青山當我前大江動我後春風吹客衣白雲落我手板
輿才尺許端坐疑掣肘三里一茶亭石闌分左右肩輿
置其上安若在科臼遙望炊煙青毳毳燕拂柳僕夫如
健犢兩脚笑狂走隔樹颺酒帘請君沽一斗

望蕭山

牛車涉畏途板輿疾如矢入舟更三番游興殊未已樟
楓皆合抱瘦影落野水雲開見青山白鳥下清泚一望
真蕭然氣象乃有此緬懷無餘孫敗衄集營壘仰瞻已

廿年吳亡始誅訶江淮空橫行霸業今已矣山川固變
遷林木尚芟翫舉酒酌風前船頭暮煙紫

山陰縣

千巖積蒼翠萬壑瀉碧流果然山陰道觸目是勝遊鑑
湖繞縣郭一派良田疇山川本靈秀民俗樂歌謳鳴琴
簾幕靜治理陳前修先君去茲邦倏忽五十秋末流務
奢侈古道誰能留種山挂落日煙嵐漲林丘浩歌遡陳
迹俯仰增百憂

種山

一名卧龍山越大夫文種葬處

烹狗藏弓語不誣可憐碧血裹頭顱伐吳七術成何用
獨讓鴟夸泛五湖

戢山

晉右軍將軍王羲之故居山下有題扇橋即右軍為老姥題扇處也

繭紙入昭陵妙蹟落何處不如題扇橋名以老姥著

峽山訪何真維留宿即事

壘嶂層巒吐晚霞鑑湖如練見平沙青山影裏開三徑

白水波邊聚一家

峽山一村皆何姓

酒美春盤烹玉版茶清香餅啖

松花無端色變綠談虎深夜頻驚噪樹鴉

主人言峽山近日多虎

峽山行

并序

先考功令山陰時鼎革初定山賊竊發民不聊生
而峽山一村尤盜藪也上官方議勦滅先考功馳
詣武林請於巡撫蕭公以招撫自任遂從二小吏
乘扁舟至峽山直入賊營諭以禍福衆皆感泣羅

拜誓為良民先考功書其名于籍給以免死牌而
縱之復榜窮鄉諭令自新餘黨悉皆嚮化浹旬復
命蕭公全活數萬計迄今五十年矣峽山父老為
嗣立追述往事莫不歎歔泣下嗣立因賦峽山行
一篇凡五百有十八字歸示子姪庶以補家乘所
未逮云爾其詞曰

白波如鏡光新摩兩山雨洗青嵯峨綺紛阡陌接衡宇
峽山一村同姓何我行訪友榜村口市聲風攪炊煙斜
閭閻老幼步踰躋太平雞犬無誼譁二三老人向余語
銜淚敘舊雙滄沱維昔順治歲在子四海渾一收天戈
妖氛餘孽聚山谷狐鳴梟噪張爪牙槍竿纏布白帕首

勦掠倉困喧官衙十家被害九家哭僵尸積路如亂麻
撞金擊柝號團練兵民與盜誰分科茲地環山更險惡
逋逃屯聚為巢窠羽書如電上州府官兵調發疊鼓搥
昆岡火炎焚玉石吾族噍類窮奔波賢哉吾侯來何暮
莅事三日驚傳訛侯曰此皆吾赤子縣令不救理則那
日行三百謁開府為言若屬良民多或誑其兇或誘餌
赦之詎即非農家一弦一矢請勿用掉三寸舌聽凱歌
親書供狀百口保甲兵手洗翻銀河因乘扁舟從小吏
波風吹帶紋如鞞旌杠刀槊森牆堵林巒兵氣騰谿谷
從吏見之正股栗吾侯氣壯朱顏和爰召賊酋告之曰
汝曹獨非人情邪紡績耕耘各有業婦依夫壻兒隨爺

奈何違性陷非僻矜凶挾狡開呀呀撐骸刊脯就屠戮
鬼村啾唧堪咨嗟曷不從我悉歸順各安田畝閒漁蓑
侯言未終盡感泣抱頭拜舞髮鬢髻丐女死命賜之酒
投戈棄甲爭紛挐千村萬落夜聲靜水田但聽官蝦蟆
迄今相距五十年生男生女攢髻了君看家家大作社
鑄金禱祀陳華奢宗支蕃衍誰之力君家汪濊恩靡涯
嗟余懷繡早失怙靈運述德慚么麼偶尋山水到茲地
先君厚澤真難磨合之家乘與邑志目見奚啻百倍加
援筆聊作峽山曲傳諸子姓千秋誇

謁禹陵

神珠入夢星飛流躬瘞樁橈畫九州茲山玉帛捧萬國

雲車風燾驅驂騶官德賞功錫茅土哥嘒蹈舞旬林丘
專車一骨獨後至精血化碧埋千秋君王會計猶未畢
胡顙髻鬢千丈湫苗山山頭騎龍去回首大叫孤雲愁
桐棺葦椁壙七尺相送入此深穴幽至今松檜影森立
山魈怪鳥白日游萬山起伏勢回抱左江右海煙中兜
鳥田方方纔踰笏

禹崩後天使百鳥還為民田至今名曰鳥田在禹廟下

菲泉活活清于油

山下有禹井曰菲泉

廟門乍啓樞衣入

日照繡栢迷彤髹穹碑篆文豈

峒嶮好古恨不逢陳留

禹碑文嘉靖中從長沙嶽麓書院攜歸刻石字奇古難辨成都楊慎謾譯之

千官

雁行象生動龍袞鋪藻縣珠旒聖心勤苦尚節儉加以
雕飾毋乃羞乖龍躍水鐵索斷風牽苻帶梁間浮

廟中伐梅木為

梁張僧繇畫龍其上忽夜風雨飛入鑑湖後人見梁上水草淋漓乃以鐵索鎖于後柱今已不存

窈石疑從胚渾結古隸

難以形聲求

窳石狀如秤錘上有古隸不可讀

此皆神聖設光怪流傳奇蹟

供羅菟腐儒小生窮捭掘盯瞞塞耳空煩憂金簡玉字
隋灰劫陽明洞口尋前修神功明德誰其似俎豆百世
夫何尤魚鼃幸免食禹力敢以蚓竅鳴相酬馮高決皆
眼底闊獨立覆黼聊夷猶會稽山狀如覆黼亦謂之覆黼山試問馬遷與東
野游興亦似今番不

南鎮

揚州之鎮誰為雄永興封自開元中會稽岩堯接雲漢
羣峰如浪爭朝宗我行遶礪蹋松影萬株合抱穿青穹
蚪龍無風自鳴嘯厓谷響應投碇墜蒼顙落水翠凌亂
山溜激玉聲玲瓏遙望朱甍乍光炯粉牆丹柱藏蒙籠

入門陰風嘯四壁神官鬼物雕鏤工執笏張蓋見奇相
生氣奕奕舒雙瞳庶下何曹曰掌夢勾致魂魄精誠通

廟前石碑云有武弁于此祈夢夢神授二方印後官至總兵適攝他鎮得二方印與夢中無異

振衣升堂默拜禱自慚

潦倒方途窮三十頭顱已如此矻矻守死書中蟲馮神
乘雲排閭闔吉凶修短惟天工儵忽擗飈攪空谷紫赤
怪氣重重烘香爐噴煙縮菌蠢石傘障日含腫隴香爐石傘俱峰名
長嘯一聲出廟去碧海明滅波心紅騎龍跨鳳環珮
合仙官朝罷回靈宮

鑑湖

鑑湖三百映澄鮮吸盡羣峰落野田賀監宅邊波豔豔
柳姑廟外草芊芊魚穿菰葉吞山影雀啁楊花撲水天

安得越溪如雪女新妝齊唱採紅蓮

吼山

我來山陰道上行游興正濃歸興急真如駿馬過花村
佳處得一翻忘十昨宵秉燭下會稽半夜鑑湖猶鼓楫
清晨已到曹家山洞口紅霞水面吸峭壁中流劈劍門
日月陰森奇鬼立鑿開混沌井中天一綫春光半空入
迴篙觸岸石控控老魚拔刺驚伏蟄繫纜行穿青棘園
犬亭山勢更業岌何年玉筍矗靈根磔卓孤峰冷雲襲
蒼蘚煙蘿作錦綉十丈崔嵬落原隰趙氏六陵光鬱蔥
爛熳羣山疑拱揖日落冬青叫杜鵑氣酣一望增於邑
忽聞巖脚鐘春鐺幾簇茆菴新補葺平鋪石几安石牀

髓滴簾泉泉眼溼

山畔空明菴鑿石几石牀峭壁有簾泉二字

匠心巧妙奪天工般

郢一去誰能及牛豕茫茫遶澗邊
延螺小徑昏鷗集歸舟紀事賴新詩付與奚奴好收拾

柯山二絕

春樹鐘聲破綠煙画橋楊柳拂行船歸心正泊柯山下

曉月清霜想皎然

皎然柯山寺詩云古磬清霜下寒山曉月中

怪石霾雲百尺長斷碑古佛總荒涼世間不少知音者

忍令空山嘯折篁

山上舊有柯亭即蔡中郎取竹作笛處也

牧牛圖四絕

為李掌綸題小照

鼓翅羣鷗上角飛稻畦蚱蜢撲蓑衣柳陰滿地眠芳草
盡日無人一笛微

青麻曳鼻任僧牽溼溼垂頭過佛前堪歎劉家八百里
幾曾領取瀉山禪大滄安公曰吾依瀉山住不學瀉山禪但牧一頭水牯牛
短衣濯足野橋東著麥苗吹澹澹風空谷料無人逐鹿
此身誰識是愚公

帶角歧蹠似也無飢齧菟豆嚼菰蒲南山白石無窮意
好引歌聲入畫圖

紺池上人以商丘公過香巖寺看菜花詩索題
奉次元韻二首

衙散行春陌城南徧菜花斷橋青漲滿野寺碧雲遮壁
挂生綃画甌嘗活火茶小桃斜更好遠近映紅霞
中丞攜小隊半日且逃禪風度真超絕清談更邈然市

聲喧晚渡野色護春煙歸路濃香發新詩就幾篇

題勞在茲画次介于韻

画工論画取形似俗筆紛紛笑坡老幽處可居平可行
誰似此君胸次好斷厓枯木明且淨輕風實葉迹未埽
片石稜稜山骨堅間以瘦竹併幽草雲崦煙岫見慘舒
就裏秋毫辨側島扁舟出沒一漁翁鼓柁悠然狎鷗鳥
公幹新詩點染工更覺筆意超象表賡餘重展便面看
一抹秋山青未了

題文南雲先生雙松圖

何人點染雙松樹垂龍舞爪驅雲霧山風謾謾翻怒濤
欲入青天留不住前朝画手推沈文待詔之後今南雲

能以性情寄筆墨遊戲尺幅成氤氲千丈生枝黛新埽
樹底攜琴望晴昊一彈忽訝衆山鳴迸破流泉三峡倒
山南峭石看峻嶒嵌空翠篠懸枯藤影落灣深隨飛鳥
蒼顛散亂疑崩奔前秋竺塢曾棲宿夾路龍蛇天半矗
紙上馮君乞一枝夜聽蒼波碎茅屋

題木文上人鶴舟圖

霜毛弄影受風翻對立船頭浪不喧早識太湖山色好
不教終日去乘軒

沙堡徐烈婦詩

鳩鳥翩翩挾狡呼所天一去淚模糊此情已誓同生死
好向黃泉認故夫

頭還可斷節難更三尺羅巾送此生怨氣如山吹又積
年來海浪不曾平

送汪廣文之任桐廬

琴書滿載遡驚湍一望桐江秋欲殘朶朶亂山濃似画
粼粼淺水澹於官青泉瀉石猿升樹紅蓼翻波魚上竿
騎馬醉歸饒韻事新詩題徧子陵灘

曉自上沙山莊遊白雲泉過龍門大小石屋登
天平山絕頂望湖臺至蓮花洞小憩覓路遶澗
歸次介于韻

山風破曉來葉葉響珠露初日罩薄雲峰尖故吞吐天
平矗檐端岩堯引余步小徑踏茶棵沙路晴散霧松聲

亂澗泉鳥族喧古墓人行宛轉橋笑指范家圃落葉摧
琅玕秋山覺寒素涓涓白雲泉一綫溜石乳雲水兩無
心何煩事鎔鑄洗眼嚙清甘斷碑哦舊句斗起雙龍門
突兀勢交互徑窄風怒號頂削虹奔度鑿翠石屋開誰
貽魏王瓠靈根託虛無投足雲礙路可憐剩殘僧有似
窟中兔捫蘿最高頂呼吸仙翁遇湖闊青天低臺空怪
石聚乍疑寄竿橋嫋娜桔柏渡厓谷齊哈呀黯黯如欲
暮下尋蓮花洞幽香著芒屨秋風搖夫容木末粉新傳
相與插花歸何殊佩寶璐緩步聽細泉莫使溪行誤

附原詩

劉石齡

晨興望四山濃翠泫秋露天平峰蒼涼海日正微吐

趣飯果朝腹結韉試野步有客攜杖先彭鏗啄巖霧
慈烏號枯叢禮鼠拱幽墓脩脩蕎麥花雪點煙外圃
柘葉參楓林丹黃落縑素白雲尋舊泉滴滴雪山乳
草茶發幽香無事誇日鑄雲泉本無心惆悵壁間句
龍門路巉絕林麓莽回互雙崖鬼手劈健足飛鳥度
嵌巖石作屋大小僅如瓠相與躋其巔密篠啓微路
仰看望湖臺月腹翳兔兔遠公跡已杳遺事悵所遇
山危徑逾澀風急雲轉聚澄湖覽空明孤帆來野渡
潑墨湖外山停午色如暮徘徊蓮花洞嵐氣襲巾屨
澗邊夫容花娉媿粉初傅歸吟白蘇美子詩空音振璆
璐松門苦相同涉澗行屢誤

山陰集
五
晚度小嶺由龍池遊華山松徑次介于韻

山行爽遊目窮日孤懷騁佳處雖涉獵終勝夜燭秉杖
藜陟陂陀瘦日澹幽境磴蘚當路滑亂石斜復整鋪白
映蕎麥按藍綴桔梗倦脚倚顛厓彭亨漲蛙黽林聲敲
淙琤雲勢頓勇猛風緊鳥轉疾人喧山愈靜龍池水增
波老樹浸盤瘦意行仰看山不覺溪路永夾道列長松
散亂蒼顛影褰衣踏日光流水涵藻荇小亭晝陰沈綠
色變清景須眉寒森森坐久衣裳冷蓮華擁絕巘倚天
立頑礦影落玉女盆搖蕩深淵靚臨流戲濯足奇句寧
可省如船藕十丈敢向太華請夜月吐豔豔于焉托幽
屏雉尾搖赤杉鴨脚落銀杏殘秋更淒涼孤影抱虛警

天池沒落日滉漾碧千頃安得上上頭決背望諸嶺

附原詩

劉石齡

游思不可窮有足期一騁誰能間白日坐待華燭秉
龍池至華山五里接幽境白道縈秋煙小嶺秀而整
野花不一名紫豔饒桔梗寒湫閉陰獸俯瞰但蛙黽
恐有靈異姿或致風雨猛中休得小亭已覺初地靜
松樞皆十圍根幹怒虯瘦諸山數松徑未若茲雋永
翠色涵秋空青天落孤影仰視碧水間浮彼藻與荇
遊人如游魚歷歷溯清景風泉激空崖聲應玉磬冷
想當急雨時飛雪濺幽礦鳥道洵奇絕怪石隱幽靚
俗書敢深刻鏟滌詎可省山靈困鯨鑿吾欲血面請

陰沈紅樹林蕭條人事屏何須煩春風丹頰姹桃杏
暮山發鐘梵昏飈助悽警窈冥蓮華峰開闔在俄頃
無由窺天池殘日隋西嶺

綠蔭齋看古桂花作

秋光堪娛人晨夕酒是務况聞花正開折簡有不赴幽
齋傍西郊小山桂無數入門光照眼一片黃金鍍濃香
甜勝蜜單衣著天露車蓋更童童何年得此樹霜皮剔
乾蘚蔥蒨葉四布連蜷盤修蛇剝落集書蠹蜂聲響半
空疑挾風雨怒一枝分桂林賸理自天付
前歲古桂中忽發一枝其色甚丹
激景射月宮修修拂寒兔執斧吳剛愁竊藥姮娥妒前
年到君家醉歌窮日暮今年重來看粉壁猶遭汗風塵

方瀕洞花信嗟屢度攀枝難久留後會又恐誤喚取麝
煤濃倚闌拭輕素飲罷自吟哦折花覓歸路

題宋二山言學詩圖四絕

竹屋芭蕉覆綠苔兩生妙筆絕塵埃
圖為禹尚基寫照王石谷補景無端結

个蕭疎地大小蘇還入画來

攤書覓句坐匡牀杜老欣看宗武長堪笑謝家佳子弟
臨岐才賸紫羅囊

射鴨西陂用竹枝驪珠獨得緯蕭詞倩他更寫匡廬景

落月孤舟侍說詩
漫堂先生新刻說詩一卷內云庚申歲舟泊鄱湖月夜望匡廬與山言共作詩話

詩到綿津渤海寬望洋真覺浩漫漫傳家定有金針在
只許侯芭紙上看

雲間高查客以送春日遊蘭亭詩四首索和即
次元韻寄之

巖巒崔萃壯樓臺丹牖初新生面開尋勝何人載酒至
相逢都是渡江來魚跳斷澗應知樂花老籜枝漸欲頽
手弄潺湲乘竹筏笑看陳迹共裴回

何事山陰輒逗留輸他內史逞風流淒涼繭紙昭陵蹟
悵望鵝籠蘭渚遊健筆放懷凌鮑謝短牆縱目笑曹劉
年來頗慣登臨興勝事全憑兩足求

小宋經營誰與攀天書親捧出朝班平鋪亂石迴環水
點綴孤亭金碧山紅糝雲烘濃澹裏綠深風響有無間
花光竹影參差合萬壑千巖擁髻鬟

論文高李乍同行攜手周旋略送迎鋸玉談深超晉宋
敲金句響挾幽并帽檐亂打憐花點衣桁頻啼見鳥情
恰是莫春三月景谿山縹緲画難成

山陰集終

國

朝野

山陰集

卷

